


Gavinu Santoru est nàschidu in Tiesi su 25 de santuaine de su 1923. Su babbu Anghelu fit pastore, sa mama si naraiat Gavina Porqueddu. In bidde aiat fatu s'iscola finas a sa cuinta elementare, in su mentres però aiat comintzadu a bessire a campagna e gai aiat imparadu s'arte de su pastoriu chi at pratigadu finas dae disterradu. Tiu Gavinu ammentaiat semper chi cando aiat bindighi o seigh'annos fit istadu Luisi Piredda, frade de Antoni, a l'ispinghere e fàghere sa prima otava, e poi aiat sighidu a cantare sa poesia cun totu sos amigos de bidde e de foras. Issu etotu naraiat chi fit de s'iscola de sos tiesinos: Andria Ninniri, Luisi Peralta, Antoni Santoru, Fovoreddu Santoru e Antoni 'e Monte ca iscultende a issos, e sos medas àteros poetas de bidde, s'aiat fatu s'orija a sa poesia, aiat imparadu sa mètrica e umpare s'arte de improvisare su versu. Ma fit finas amigu de medas àteros poetas chi in vida sua at intopadu e chi, comente testimonzan sos iscritos, an cantadu umpare o si sun iscritos, finas a poi de su disterru.

Sos últimos annos de vida los at passados in bidde.




Gavinu Santoru

Tiesi su 25 de santuaine 1923

Tiesi su 17 de bennarzu 2009



Moda pro Nostra Segnora



Meravigliosu est totu su criadu
cantu ch'at in sa terra de ammirare
cun totu sas richesas de su mare
cun perlas e de pisches populadu.
Bellu su firmamentu biaitu
de pianetas e istellas pienu
e-i sa luna chi dat risplendore
illuminende totu s'infinitu
dende a su note unu lugore amenu
distruende s'immensu iscurigore.
Ma tue Virginella Nazarena
già risplendes pius de ogn'istella
de su sole pius calore rendes
pius de sa luna lughes in totue.
O Nazarena Virginella tue
già risplendes pius de ogni istella-
tue, o Nazarena Virginella
pius de ogni istella già risplendes-
pius de su sole calore rendes
lughes totue pius de sa luna
ca est in manos tuas sa fortuna
de totucantu su gènere umanu
ca de s'Onnipotente Soberanu
ses mama, ses muzere e li ses fiza.

Primu fiore

Comente semus vivende ti abbiza
s'ódiu veramente est dominende-
abbiza comente semus vivende
s'ódiu est dominende veramente-
abbiza vivende semus comente
s'ódiu veramente dominende este

s'ambizione, sa maligna peste
s'interu mundu est in cunfusione-
ch'est sa maligna peste ambizione
in cunfusione est su mundu interu
ca chie cheret formare un'imperu
chie de dominare tenet brama.

ca de s'Onnipotente Soberanu
li ses fiza, muzere, li ses mama



Segundu fiore


Atzende de s'amore sa fiamma
de su rancore su fogu istudende-
e de s'amore sa fiamma atzende
istudende su fogu de su rancore-
atzende sa fiamma de s'amore
de su rancore istudende su fogu
chi siat respetada in-d-ogni logu
cudda paghe tantu disizada-
siat in-d-ogni logu respetada
cudda tantu disizada paghe.

Maria, cussa gràtzia nos faghe
da chi de totu ses Signora e mere
ca de s'Onnipotente Soberanu
ses mama, li ses fiza, ses muzere.

Tertzu fiore

Tue ch'in s'universu as su podere
su progressu pigàreche a sa nue-
ch'in s'universu su podere as Tue
pigàreche a sa nue su progressu-
Tue ch'as su podere in s'universu
su progressu a sa nue a che pigare
ma chi siat progressu de nos amare
comente Deus lu preigiat-

de nos amare progressu chi siat
comente lu preigaiat Deu
bontade, fratellàntzia cun amore
regnet sa paghe in su mundu intreu
chena diferéntzia de colore
pensende solu a su bonu oberare.
Siat ricumpensadu su suore
chi potat ogni póveru arrivare
a fàghere una vida dignitosa
comente solimus totu disizare
e-i sa vanidade ambitziosa
chi tenet oe s'òmine terrenu
si giret in paghe maestosa
si giret in amore su velenu
de cuddos chi famidos che ienas
cheren suzare su sambene anzenu.
Assisti totu sos chi sun in penas,
sana sos males de ogni calidade
sega a sos innotzentes sas cadenas,
chi torren dae nou in libertade
e chi agaten ogni janna abberta;
vivende in mesu sa sotziedade
torren a faghene una vida onesta
ismentighende totu sos afannos.
Prosighende sa tua bella festa
comente amus connotu dae sos mannos
sigan a Ti festare sos minores,
ca ses Mama 'e s'Eterna Providéntzia
no tzessen mai de Ti fàghere onores,
cantu durat s'umana descendéntzia
duret sa festa Tua a medas annos.



Otavas



A pastorigare non b'andat Andria,
tirat sa fodde e colpat su marteddu
ca est mannu e pienu de fantasia
ma istet atentu cun carchi piseddu
ca fit Davide puru pastoreddu
e mortu at su zigante Golia:
e si no istat atentu in su futuru
podet sutzeder gai a Andria puru.

Chie tenet in manos sos navios
podet ogni oceanu atraessare:
Andria tenet fortza e tenet brios
niunu bi lu podet dennegare
ma dae terra trainos e rios
già finin totu a che imbucare a mare
e-i su mare cun immensu onore
atzetat che-i su mannu su minore.

Cantadas pro Andria Ninniri

Virgine Santa fàghelu su prou
già chi ses mama 'e su Verbu Divinu,
comente as pregadu a fizu tou
cando at cunvertidu s'abba in binu,
tòrralu a pregare dae nou
e invòcalu su Tou Bambinu
chi custa grascia fetat in su mundu
sa 'oghe sana torret a Remundu.

Cantada pro Remundu Piras

"Un'annu aimis invitadu a cantare a sa festa de Nostra Segnora a Antoni Piredda: prima at atzetadu, poi non b'est bénnidu ca nachi su preju fit basciu e at ripostu cun-d-una otava".



Bènnere a cantare pro sa festa
desi adesione voluntària,
ma cun sa tua oferta contrària
già t'as serradu una janna aberta:
ca non còmporas cun simile oferta
mancu sa merce pius ordinària.
Deo non bendo si su preju non bastat
ca tantu est merce chi non si guastat!

"E deo l'apo rispostu"

Fizu chi negat a s'apellu 'e sa mama
dae chie at tentu su primu carignu
non si podet giamare fizu dignu,
li mancat de s'amore sa fiama:
issa 'e l'àere in sinu tenet brama
invece issa rispondet a disdignu
e indignadu sas palas li girat:
pius de mama s'interessu mirat.

Imbiadas a Barore Sassu



Iscusa Barore de su ritardu
sa libertade chi m'apo leadu
si mi so a iscriere azardadu
a chie at versu robustu e gagliardu,
famosu cantadore in versus sardu
fizu de s'Eliconu numenadu
eroe de sa sarda poesia,
ispero 'e mi risponder dignu sia.

Sa risposta a mie l'indirizza
fatendemi ischire de sa porchedda,
si l'as bintradu in su coro sa fritza
a s'ochisolza sa maghi niedda;
si fit savorida d-ogni purpedda
e s'est bessida 'ona sa sartitza,
panceta, lardu cun ozu porchinu:
de totugantu informande a Gavinu.

Già t'aimis prommissu su mannale
e non benimus mancu a sos faeddos,
ma bendidos los amus totu umpare
sos biancos, sos canos e nieddos.
Ma già bi sun sos ateros porcheddos
chi faghen s'annu a su mese de Nadale
e, si sun sanos e non tenen dannos,
poden faghene mezus de sos mannos.

*"Custas otavas sun bistadas mandadas ca, unu paiu de meses innanti,
Barore aiat leadu un'ochisolza e non si fit bidu pius a la pagare e fit pro bi lu
ammentare"*

Riposta de Barore Sassu



Sa libertade e sa cunfidentzia
chi tue t'as leadu in custu casu
ista puru seguru e persuasu
chi non mi das peruna impertinentzia,
ne negare ti poto s'acoglientzia
già b'at logu pro tutu in su Parnasu,
antzis cuntentu, amabile Santoru,
mancari t'acotemus a un'oru.

Sa porchedda la tenzo ancora 'ia
non l'apo morta ne la 'oco ancora,
ma cantu paret bella a parte 'e fora
non est bella comente la cheria:
ogni mese li pigat sa mania
chi paret deperida e patidora,
ma, si non sanat dae perun'ala,
l'asseguro chi faghet Pasca mala.

Già m'aias prommissu su mannale
de degheoto e pius a bochire,
e como as detzisu de mi servire
cun d-unu chi un'annu at a Nadale,
arrischende interessu e capitale
chena b'essê su tantu 'e nde godere,
e, ca sun medas sas dies de s'annu,
nois amus bisonzu de porcu mannu.

*“Sa prima borta apo cantadu in Roma in su mese de Cabidanni de su ‘43 cun
Antoni Santoru Bicaciu e Antoni Cubeddu: m’ammento sas primas otavas”.*



Antoni Santoru

No ti lu cherzo che poeta elègere
ne ti so nende d'esser cantadore.
Ischis, de tempus ancora est minore
duncas, ti prego Cubeddu, a lu protègere:
si t'abbizas chi faghet carchi errore
che babbu 'onu lu debes currègere.
Tue cantende, Gavinu, ti esprimas
chi Cubeddu t'agiuat e non timas.

Antoni Cubeddu

Antoni Muratori Ludovicu
chi sa natura dotadu l'aiat
póveru 'e benes, d'intelletu ricu
mezos de imparare non teniat.
Su mastru dae fora iscultaiat
suta 'e su balcone in mortificu
e morit esaltadu in fama eterna
su babbu de s'istória moderna.

Gavinu Santoru

E Antoni Muratori ancora
est in Itàlia famadu assai,
acuistadu già s'at in cuss'ora
fama eterna chi non morit mai;
deo puru cun bois fato gai
cantende bos isculto dae fora
poi ch'isculto, intendo e imparo
tando a cantare ja mi dichiaro.

Tertzinas a un'amigu



Amigu caru dae logu lontanu
una litera mando afetuosa
pro ti fagher ischire chi so sanu.

Cun su saludu sa person'est briosa,
deo godende già lu so a reu:
pro te ispero sa matessi cosa.

Bisto 'ene ringratziende a Deu:
da chi b'est su saludu, bi est totu,
in sa vida non b'at mezus recreu.

Su restu 'e sa vida, un'abolotu
chi est che-i sas undas de su mare
ch'est die e note de continu in motu.

Cosas medas cheria racontare
ma no mi lu permitit s'intelletu
in rima sarda de m'ispiegare.

Però cant'iscrìo est cun afetu
e tue cun afetu ti lu leges
no pro s'iscritu, ma pro su diletu:

tzertu chi monumentu non nd'ereges
ca non b'agatas unu versu aladu
e si b'at carchi errore, lu curreges.

Totu su chi sa mente m'at detadu,
subra de custu biculu 'e pabilu
iscritu l'apo totu e copiadu:

si apo fatu isbagliu, naramilu
ca ses intelligente e ses avetzu
tue, ca fina in s'ou agatas pilu.



Deo de Tiesi non fato dispretzu,
comente limbis malas ana nadu
ma sempr' in coro, si camper'a betzu,

ue apo s'aju a lughe ispalancadu
e respiradu su primu alientu
e su primu suspiru b'apo dadu

e b'apo dadu su primu lamentu
e-i sa prima beneiscione
e assazadu su primu alimentu.

Cantu naru no est pro fintzione
e tue chi lu penses già l'ignoro
chi no epa a Tiesi passione

Est chi b'apo inie su tesoro,
su chi su tempus no podet distrùere:
chie m'at dadu vida, anima, coro.

Oe est unu punzu de piùere
ma pro me est piùere sagradu,
dae sa mente non mi podet fùere

chi a sas vintibator oras chi so nadu
su Babbu Soberanu Onnipotente
de-i cussu carignu m'at privadu.

Como fino s'iscritu veramente.